



## Publicaziuns dalla vischnaunca, jamna 5

### Lubientschas da baghegiar

L'istanza da baghegiar ha concediu suandontas lubientschas da baghegiar:

#### **2011-1054/02**

Helena e Pirmin Lozza-Camathias, Via Sontget 11, 7180 Disentis/Mustér; casa nova d'ina famiglia, lavurs da contuorn/cumpletaziun dil project, parcella 1006, Via Sontget, 7180 Disentis/Mustér.

#### **2012-1075**

Bruno Tschuur-Dermon, Via Craiers 3, 7180 Disentis/ Mustér; construcziun ina bargia da lenna sin parcella 1820, Via Craiers 3, 7180 Disentis/Mustér.

Quellas lubientschas san vegnir contestada enteifer 30 dis dapi la publicaziun el Fegl official Surselva tier la Dertgira administrativa dil cantun Grischun.

Disentis/Mustér, ils 30-1-2013  
*Uffeci da baghegiar Disentis/Mustér*

---

### Radunonza d'orientaziun publica – Invit

**Mesjamna, ils 6 da fevrer 2013 allas 20.15** ha liug en halla Cons ina orientaziun publica cun suandontas tractandas:

1. Presentaziun dils projects da votaziun dils 3 da mars 2013:
  - 1.1 Iniziativa per ina midada dalla constituziun communal
  - 1.2 Credit per la sanaziun dil parcadi Centrum
2. Orientaziun entras ils caus da departament sur da projects futurs
3. Discussiun

Cordial invit a tuts interessai. *Suprastonza communal*

---

### Taglia da tgauns 2013

Naven d'immediat **entochen la fin fevrer 2013** san las marcas da tgauns vegnir retratgas tier l'administraziun communal.

**La taglia da tgauns munta pigl emprem tgaun frs. 120.–, per mintg'ulteriur tgaun ella casada frs. 180.– per onn.**

Per scadin tgaun sur treis meins che vegn tenius sin territori dalla vischnaunca ei da pagar ina taglia. Tgauns da polizia, da lavinias, per tschocs e suords ein deliberai dalla taglia, ston denton purtar la marca da tgauns. Nus supplichein da comunicar all'administraziun communal midadas, q.v.d. tals che han retratg 2012 ina marca da tgauns ed han **buca pli il tgaun, ni novs possessurs da tgauns.**

Naven dils 1-1-2007 ston tuts tgauns esser marcai cun in microchip ni cun ina tetovaziun bein veseivla. Il tgaun sto era esser registraus tier la Animal Identity Service AG (Anis), Berna. Nus supplichein tut ils possessurs da tgauns da risguardar quellas prescripziuns. Plinavon fagein nus attents Vus sin suandontas prescripziuns:

### **Cuors da tgauns – cuors obligatori**

#### **Cuors teoretic, artechel 68 alinea 1, ordinaziun davart la protecziun d'animals**

Tgi che ha aunc mai possediu in tgaun ei obligaus d'absolver il cuors teoretic avon che cumprar in tgaun. Quei vala per mintga possessur da tgauns che sa buca demussar ch'el ha gia possediu in tgaun avon ils 1-9-2008.



## **Cuors practic, artechel 68 alinea 2, ordinaziun davart la protecziun d'animals**

Enteifer igl emprem onn da cumpra sto mintga possessur cumprovar il mussament dil cuors practic. Quei vala per mintga tgaun che vegn ni ei gia vegnius cumpraus suenter ils 1-9-2008. Quei cuors sto vegnir absolvius cun mintga niev tgaun. **Igl attest dil cuors sto vegnir presentaus tier la retra tga dalla marca da tgauns per igl onn 2013.** Ulteriuras informaziuns anfleis Vus sut [www.bvet.admin.ch](http://www.bvet.admin.ch) ni sut [www.fludog.ch](http://www.fludog.ch).

*Administraziun communal Disentis/Mustér*

---

## **Alarm d'emprova**

Tenor comunicaziun digl Uffeci da militar e da protecziun civila dil Grischun ha liug en l'entira Svizra **mesjamna, ils 6 da fevrer 2013 allas 13.30/14.00 alarm general ed allas 14.15 alarm d'aua.**

Ei setracta d'alarms d'emprova tier ils quals ei vegn examinau d'ina vart sche las sirenas funcziun-schan e da l'autra vart vegn dau la pusseivladad d'emprender d'enconuscher ils differents tuns d'alarm.

## **Alarm general**

Cun quei alarm vegn la populaziun alarmada en cass da prighel smanatschont. Il signal alarm general ha in tun che crescha e sbassa e che cuoza ina minuta.

Aschinavon ch'il signal alarm general avisescha **ordeifer igl alarm d'emprova**, lu significhescha quei ch'ina periclitaziun dalla populaziun ei pusseivla. En quei cass vegn supplicau la populaziun da tedlar radio, da suandar las ordinaziuns dallas autoritads e d'informar ils vischins.

## **Alarm d'aua**

Igl alarm d'aua vegn menaus atras allas 14.15. In tun bass interruts regulau che cuoza sis minutas. La populaziun sto interprender neginas mesiras. Igl alarm d'aua vegn ins ad udir mo el territori nua ch'ei sesanfla lags da fermada. Dils plans cul territori periclitau sa vegnir priu investa tier l'administraziun communal.

Aschinavon ch'il signal alarm d'aua avisescha **ordeifer igl alarm d'emprova**, lu significhescha quei ch'ina periclitaziun dalla populaziun ei pusseivla. En quei cass vegn supplicau da bandunar immediat il territori periclitau.

Ulteriuras indicaziuns e reglas ein d'anflar sin las davosas paginas el cudisch da telefon, sut «Alarm dalla populaziun en cass da prighel acut». **Niev san ins leger las informaziuns sin teletext, pagina 662 ed era egl internet [www.sirenentest.ch](http://www.sirenentest.ch).**

Bien engraziament per Vossa capientscha.  
*Suprastonza communal Disentis/Mustér*

---

## **Controlla da habitonts**

### **Naschientscha**

Serhat Duran, naschius ils 10 da schaner 2013, fegl da Mehmet ed Emine Duran-Ayhan.

### **Mortori**

Maria Schnoz-Alig, naschida ils 9-12-1937, morta ils 28-1-2013.



### Clom d'urgenza 118

Preziadas vischinas, preziai vischins

Onn per onn dat ei cass en nies cantun nua ch'ils pumpiers vegnan clamai memia tard sil plaz da seracass. Savens emprovan habitontas e habitonts da cuntonscher pumpiers ch'els enconuschan via telefon privat. Il temps che va aschia a piarder ha ils davos dus onns caschunau la veta a duas persunas el Grischun! Plinavon daventan ils donns cun mintga minuta spiarsa pli gronds. Perquei s'adressein nus a Vos cun ina ferventa supplica: **clamei ils pumpiers mo sur il clom d'urgenza 118**. Era sche Vos veis mo in pign problem sa il polizist che pren encunter Vies telefon reagir aschia che mo ina pintga gruppa d'agid ni singulas persunas vegnan clamadas. Ulteriuras informaziuns era davart la prevenziun anfleis Vos sin nossa pagina [www.pumpiers-sursassiala.ch](http://www.pumpiers-sursassiala.ch).

Engraziel per Vies sustegn! *Vos pumpiers Sursassiala*

---

### Presentaziun da Marco Rima a Mustér

**Venderdis, ils 22 da mars 2013** presenta Marco Rima siu program «*Humor Sapiens*» el Center da sport e cultura a Mustér. Uniuns che vulan guder la porschida obtegnan ina reducziun da prezi. Cundiziun persunter ei che silmeins tschun persunas fetschien diever dalla prevendita e reserve-schien plaz da seser. La gliesta cun ils numms dallas commembras e dils commembers cun indicaziun dalla categoria da plazz e dall'unien sa vegnir inoltrada per mail a Roger Tuor ([roger@tuor.ch](mailto:roger@tuor.ch)). Leu obtegnan ils interessents era ulteriuras informaziuns davart la porschida.

Categorias da plaz mira [ticketcorner.ch](http://ticketcorner.ch).

---

### Pro Senectute: Patienzen legen/Patience

Mira/siehe unter [llanz/Glion](http://llanz.ch).

---

### Uniun samaritana Mustér

Nies emprem exercezi meinsil digl onn niev ha liug: **Gliendisdis, ils 4 da fevver 2013 allas 19.30 en casa da scola, Cons.**

Selegrond sin ina stedia participaziun envida  
*la presidenta*

---

### Ludoteca Disentis/Mustér

**Mardis, ils 5-2-2013** dallas 19.00–21.00 ha puspei liug ina **sera da giugs publica** ella ludoteca Muster. Cordial beinvegni a pign e grond, giuven e vegl.

**Gliendisdis tscheiver, ils 11-2-2013** resta la ludoteca Muster **serrada**. Nus engraziein per Vossa capientscha.

*La squadra dalla ludoteca Mustér*

---